

Incumbensa Mazzetta concernent in'offensiva solara vid las infrastructuras stradalas chantunalas

Avant pli che 30 onns è vegnì constrüì l'implant da fotovoltaica per lung da la N13 tar Favugn. Quella giada è quai stà ina prestaziun da pionier. Durant in lung temp n'è betg capità bler en quest sector, malgrà che experts stiman ch'il potenzial d'implants solars sin construcziuns d'infrastructura da las vias saja fitg grond. La Confederaziun e singuls chantuns vulan ussa trair a niz en moda offensiva quest potenzial nunutilisà. Il potenzial d'implants da fotovoltaica che na vegn betg duvrà per agens implants, vegn mess a disposiziun a terzas persunas.

Cun ina procedura da candidatura ha l'Uffizi federal da vias UVIAS cumenzà in'offensiva solara per la rait da vias naziunala. Scleriments da la Confederaziun han numnadamain mussà, ch'ins pudess producir var 55 GWh electricitad solara per onn per lung da las vias naziunalas. La procedura da candidatura è terminada e las sorts èn gia repartidas. L'Uffizi da construcziun bassa dal chantun Berna è suandà cun in'atgna procedura da candidatura. En il chantun Berna vegnan ussa planisads tut en tut 28 implants da fotovoltaica cun ina prestaziun totala da 10 MW vi da parais da protecziun cunter canera, mirs da protecziun, punts ed edifizis. Cun quai surpiglian la Confederaziun ed il chantun Berna lur funcziun d'exempl per realisar la strategia d'energia 2050.

Il chantun Grischun tira sez medemamain pli savens a niz il potenzial d'implants da fotovoltaica sin las infrastructuras da las vias dal chantun. Ina strategia solara offensiva per metter a disposiziun er a terzas persunas il potenzial ch'ins nizzegia betg sez – resguardond ina protecziun adequata da las construcziuns artificialas – manca fin ussa. Fin oz datti mo singuls projects privats vi da l'infrastructura da vias.

La Regenza vegn incumbensada:

1. d'eruir en moda uschè simpla sco pussaivel il potenzial utilisabel d'implants solars per lung da las vias chantunalas, sco vi da mirs da sustegn, punts, mirs da protecziun cunter canera, edifizis e parcadis, e da sa concentrar en quest connex sin lieus che porschan bunas premissas tecnicas (p.ex. concernent las pussaivladads d'alimentaziun);
2. d'instradar ina procedura da candidatura per il potenzial erui, per che terzas persunas possian s'annunziar per las surfatschas / sorts.

Cuira, ils 12 da zercladur 2024

Mazzetta, Luzio, Kohler, Altmann, Atanes, Bachmann, Bardill, Baselgia, Berther, Berweger, Biert, Bischof, Bisculm Jörg, Bleuler-Jenny, Brunold, Bundi, Collenberg, Danuser (Cuira), Das, Della Cà, Dietrich, Gansner, Gredig, Hartmann, Heini, Hoch, Horrer, Jochum, Kaiser, Kasper, Kocher, Laim, Michael (Donat), Michael (Castasegna), Müller, Natter, Nicolay, Preisig, Rageth, Rettich, Rusch Nigg, Rutishauser, Said Bucher, Schneider, Schutz, von Tschanner, Walser, Wieland (Tumein), Wilhelm, Zindel